



UTebello Nyokong, iSazinzulu esilwa nomhlaza

Nomsa Angelina De Wee
Simon Mokoena



UTebello Nyokong siSazinzulu esibalulekileyo eMzantsi Afrika.

Ulwazi lwakhe luyanceda kwaye lusindisa abantu abanezifo ezibi.



Esakhula uTebello wayehlala nomakhulu kunye notatomkhulu wakhe eLesotho. Bamkhulisa kakuhle.

Ngezinye imini wayesiya kwalusa aze ngosuku olulandelayo aye esikolweni. Oku yayikukuqala kwemfundo yakhe.



Xa wayesalusa iigusha uTebello wayedla ngokuqwalasela ezinye izilwanyana kwanezityalo.

UTebello wayenomdla kwinto yonke emngqongileyo. Wayengumntwana ondwebileyo.

Wafunda lukhulu ngendalo ukususela kwizityalo ukuya kwizilwanyana ezazilapho efama.




UTebello wayefuna ukufunda ezeNzululwazi esikolweni.

Bamxelela ukuba angakhe alinge, babekholelwa ekubeni iNzululwazi yayisisifundo esinzima.

Bathi ezeNzululwazi zifanele amakhwenkwe hayi amantombazana.

Ekuqaleni wabamamela. Abahlobo bakhe esikolweni babefunda ezinye izifundo.



Nangona kwakunjalo uTebello wayefuna ukufunda ngezeNzululwazi kuphela. Wayesazi ukuba angakwazi ukumelana neso sifundo.

Ekugqibeleni bamvumela ukuba asifunde esi sifundo. Wavuya kwaye wayeqhuba kakuhle.

Waqalisa ukufunda ezeNzululwazi xa kwakusele iminyaka emibini ukuba agqibe ukufunda kwisikolo samabanga aphakamileyo.



Kwafuneka uTebello asebenze nzima kakhulu ukuze abe kwinqanaba elifanayo nabanye abafundi ababesele bekwiklasi yezeNzululwazi kakade.

Wayekrelekrele, ezimisele, kwaye ekuthanda ukufunda.

Wazifunda zonke izifundo zakhe zeNzululwazi zamabanga aphakamileyo ngeminyaka emibini wada waphumelela!



IKhemistri lolunye uhlobo lweNzululwazi yolwakiwo.
Lelinye lamacandelo olwazi lwezeNzululwazi.
Wayelithanda kakhulu eli candelo lenzululwazi
uTebello.

Ulingo lweKhemistri lwenziwa kwilabhoratri
yenzululwazi.


UTebello wayesazi ukuba ufuna ukuya eyunivesithi
ayokufundela iKhemistri.



UTebello wabhalisela isidanga seNzululwazi
kwiYunivesithi yaseLesotho.

Wayengumfundi okrelekrele owayesebenza nzima.
Wayechitha ixesha elininzi eselabhoratri esenza
amalinge.

Waphumelela kakuhle kakhulu, wada wazuzwa
inkxasomali yokuya kufunda eKhanada.



UTebello wayekuthanda ukufundela ezeNzululwazi, kodwa wayelusizi xa wayeshiya abakokwabo kwakunye nabahlobo bakhe eAfrika.

Waya eKhanada ngoba wayefuna ukufunda ngokubanzi ngophando lwezeNzululwazi apho.

Wayefuna ukuba yingcali kwicandelo lakhe lezeNzululwazi.



UTebello wadibana nabahlobo abatsha eKhanada.

Babethetha iilwimi ezahlukeyo, kodwa isiNgesi sabanceda ukuba bakwazi ukunxibelelana kakuhle.

EKhanada kwakukhithika ezidolophini ngokungathi kukwiintaba zaseLesotho.

Akuzange kube kudala uTebello wazuba inkxasomali kwakhona yokuba aqhubele phambili ngokufunda.



Emva koko waya kufunda kwiYunivesithi yaseMelika. Wagxila kuphando lwezenzululwazi ngeenjongo zokulwa izifo ezibi.

Emva kweminyaka emininzi yokufunda uTebello wabuyela ekhaya. Wayefuna ukusebenzisa Ulwazi lwakhe ukuze ancede abantu baseMzantsi Afrika.

UTebello wayezithembile.



Namhlanje uTebello unguNjingalwazi kwezeNzululwazi. Unelaboratri yakhe yezenzululwazi kwaye ufundisa abafundi eyunivesithi.

Uphanda ngeendlela ezintsha zokunceda abantu abenezifo ezibi.

Umsebenzi kaNjingalwazi Nyokong wongeza kulwazi olungokunyangano kusindisa abantu abanomhlaza.



Umsebenzi wakhe wongeza kulwazi lweNzululwazi olunceda ukulwa nezifo.

Ubomi bakhe bubonisa ukubaluleka kokuzithemba nokunganikezeli.

Sidinga ezinye iZazinzulu ezifana noNjingalwazi Tebello Nyokong!

—Imibuzo

1. Xela amazwe amathathu athe wafunda kuwo uTebello. Wakhangele emephini.
2. Esakhula ingaba wayeliqaphela ilizwe elimjikelezileyo uTebello? Ukwazi njani oku?
3. Kwakutheni ukuze bathi makangafundi ngezeNzululwazi? Uyavumelana nabo?
4. Kuthetha ukuthini 'ukuzithemba'?
5. Fumanisa ngezinye izifo ezintlanu ezixhomisa amehlo nezitsalisa nzima abantu ngaphandle komhlaza.
6. Wakha watyhafiswa ukwenza izinto ezithile? Chaza.
7. Xa ungenzi umsebenzi wesikolo, yeyiphi imisebenzi yekhaya oyenzayo?

—Iincwadi ezikolu luhlu

- UAndile Mji
- UAsnath Mahapa
- UBongani Mayosi
- UCharlotte Maxeke
- UMmantsane Moche Diale
- UMulalo Doyoyo
- UTebello Nyokong
- UTshilidzi Marwala

Eli bali liqulunqwe laze labhalwa ngeSesotho njengenxalenye yeprojekthi yezixhobo zokufunda yeZenex Ulwazi Lwethu ka2020.



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



NELSON MANDELA
INSTITUTE FOR
EDUCATION AND
RURAL DEVELOPMENT



basic education

Department:
Basic Education
REPUBLIC OF SOUTH AFRICA

*The Ulwazi Lwethu readers and storybooks have
been quality assured and approved by DBE.*

Your attribution should include the following:

Title: UTe bello Nyokong, iSazinzulu esilwa nomhlaza

Author/s: Nomsa Angelina De Wee

Translator/s: Sheila Mandlate


Illustrator/s: Simon Mokoena

Assurer/s: Bulelwa Nokele, Angelinah Dazela

Language: isiXhosa

© Zenex Foundation - Saide 2025 (Updated Edition)

CC BY includes the following elements:

BY  – Credit must be given to the creator

